

福建叢書

第一輯

福建省文史研究館編

明·福清
葉向高撰

蒼霞草全集

(六)

福建叢書 第一輯之二

福建省文史研究館編

明·福清
葉向高撰

蒼霞草全集

(六)

江蘇廣陵古籍刻印社

蒼霞續草卷之九目錄

中大夫廣西布政司右叅政星洲葉公墓志
銘

中憲大夫巡撫陝西都察院右僉都御史念
東于公墓志銘

南京前軍都督府掌府事靈璧侯湯公墓志
銘

孝廉玉崙陳公墓志銘

戶部右侍郎贈戶部尚書一川游公墓志銘
工部侍郎嗣山曹公墓志銘

卷之三

三百三

通議大夫戶部左侍郎贈都察院右都御史

諡愚菴郭公偕配包恭人墓志銘

贈奉政大夫南京吏部驗封司郎中左泉畢

公偕配項太宜人墓志銘

誥封特進榮祿大夫柱國武清侯中山李公

墓志銘

長蘆轉運使加太僕寺少卿致仕瞿公墓志

銘

明正議大夫資治尹南京兵部右侍郎贈南

京戶部尚書叔臺耿公墓志銘

封奉政大夫南京兵部

司郎中石潭陳

公偕配金宜人合塋墓志銘

南京吏科給事中思岡陳公墓志銘

蒼霞續草卷之九

福清葉向高進卿甫著

中大夫廣西布政司右叅政星洲葉公墓志

銘

閩中葉姓無多計其先皆同源而以散居故遂不通譜其族最鉅者則司安之嶺下顯者爲大叅星洲公當郎南刑曹時先通議公以江州別駕督運至留都相與論家世講昆弟禮甚歡公因以猶子視余余通籍後猶嘗一再奉公顏色而未幾公物去今十七年矣每念先德輒爲泫然今歲庚戌某

月某日公子崑奎等乃始卜葬公于南山之麓而屬余爲志銘余謹撮公生平大略而志之曰公以丁卯舉于鄉明年成進士於格得京朝官偶失當事意竟以公知石埭石埭民貧賦重往往以爭尺寸地興訟破家公爲蠲浮稅覈侵冒禁追呼省徭役革供應百蠹俱釐而時進父老子弟訓以禮義不期年獄訟大衰富民孫華與其隣爭田界久不决公庭諭之卒相讓而去兵使者與郡守嗾公無餽遺欲以微文中之公投牒乞歸士民扶攜守使者門乞留公使者訖不能奪久之遷公南刑部陝

西司主事再晉其司郎中公居曹六年理曹事斤斤執法不以滯淫爲念有百戶殺人于道獄且具主者謂江陵相國鄉人也欲曲庇之公執不可乃抵法江陵太夫人過白門傾都出謁公獨不往已出守南安郡瘠而疲又孔道二千石束帶送迎與郵吏錯趾往爲守者多悒悒不自得公處之恬如常嘆曰民未知禮未生其共一意整齊要束示以軌度如溺女厚塋諸弊俗皆爲頓革郡故有張曲江祠治所有亭爲溪濂二程授業處皆頽圯公爲葺之日與諸生講業其中一日方視事偵者報有

粵寇闔郡倉皇公笑曰守在爾民何恐從容指揮
比寇至則已授甲登陴矣寇知公有備遂遁去已
遷貴州按察司副使副使當治兵諸苗意公文吏
不習兵怙亂爲梗公潛授方略逆酋吳允熙允登
相次受縛因爲改衛建邑浚河徙民諸綢繆防禦
甚具苗禍以寧 璽書褒賚者再遷廣西右叅政
移治蒼梧時公已得末疾猶單車勉巡下邑延見
士庶示以 朝廷撫綏遐裔至意聞者人人感悅
以何以體瘁加飮卒不起公勤勞中外二十許年
未嘗營身自便一日敢怠其事而志業未竟奄忽

封疆士論悼焉其所嘗蒞石埭南安貴竹三方
後皆有祠其民聞公計皆相告奔走祠下聚而哭
公像經時不絕學使者采諸生議復祠公學宮始
公爲兒時卽穎悟能屬文母夫人常以手中縷爲
課無不成就弱冠失父母家貧又值倭亂幾不能
成喪公拮据營辦事皆如禮有一弟一妹友愛甚
篤每宦遊念及輒欲解組去聞有疾則終夕徬徨
不能寐官至三品而蓬戶蕭然薄田數畝不能克
饘粥可謂篤行清修不愧屋漏之君子矣先通議
公在日常欲與公合譜而中間世系稍有未詳遂

中輟公譜稱嶺下之葉始自學士熹傳至益尚宋
魏王郡主入明爲天台令雄雄四傳爲宗輿宗
輿生員峰公某則公祖父也員峰公爲諸生甚有
名而竟不遇以公貴贈某官娶贈宜人某氏生公
公諱明元字可鳴別號星洲其生爲嘉靖庚子三
月十日卒于萬曆甲午正月八日年僅五十五配
蔡氏繼林氏贈封皆宜人三男子啓登娶張昺奎
娶郭啓翼娶陳三女子適洪邦泰李樹芳許宗鑑
孫男二續娶呂紉聘黃婚嫁皆名族銘曰

吾聞之葉來自南陽共源異派其流則長爰在嶺

下至公而昌于守于令于彼藩方居而咏歌去則
烝嘗總帷自粵巷哭相望我父我母曷云其忘南
山之麓衣冠所藏清風如在懿範未央凡我族黨
毋替景行

中憲大夫巡撫陝西都察院右僉都御史俞

東于公墓志銘

念東于公撫陝之明年卒于其位先是公嘗以病
屢疏乞歸辭甚悽切上特旨慰留公不得已復
視事何卒不起士大夫莫不悲悼余與公同舉
南宮同官兩都最稱莫逆聞公之訃潛然涕下者
久之其孤麟喻旣自陝扶喪歸復走都門乞志銘
于余嗟夫銘公固余意也然愈悲矣公諱若瀛字
文若別號念東其先爲東牟萊陽人永樂間以尺
籍隸濟寧衛遂家濟寧歷傳至龍以高年拜爵龍

生封戶部主事賢賢生貴州左布政使錦布政公
娶封夫人謝氏生公公七歲卽能文十七補弟子
員三試皆第一學使者試諸生公又屢第一其試
棘闈又輒俛見收于是公之名日起卽山以東多
才士然無不遜公者壬午舉其鄉第二人主者本
擬公解首而以非其所治經故抑之明年癸未成
進士屬當選庶常公故工古文辭善詩歌衆咸儀
公而公意不欲曰吾於格當縣令百里牧民足展
吾志何用齷齪鉛槧間也會太夫人病遂乞終養
歸竟不就試更二年太夫人沒公先是已失布政

公哀甚至除太夫人服遂不欲仕曰仕宦以爲親也無親焉用仕所知力勸駕久之乃謁除爲兵部車駕司主事以潔廉稱辛卯典陝西試所錄文皆爾雅士習爲之一變旋移武庫司員外自員外爲郎中移車駕凡所歷曹皆斤斤持法無所假借大司馬石公嘗從容語次駕部事視諸曹稍簡宜少圓融毋太執公曰兵曹何地而可圓融耶時有哮拜之變師久無功司馬欲提禁兵往討公謂禁兵衛京師固根本豈可輕出未幾哮拜平或謂司馬功成身退此其時矣不可失也公從旁力贊之司